

# Mashujaa wa Maombi



## SABATO MCHANA

**Somo la Juma Hili:** *Dan. 2: 20-23; Dan. 6:10,11; Mdo. 20:36; Mwa. 5:22-24; Kut. 33:15-23; Kut. 32: 31,32.*

**Fungu la Kukariri:** “Haleluya. Nampenda BWANA kwa kuwa anaisikiliza Sauti yangu na dua zangu. Kwa maana amenitegea sikio lake, Kwa hiyo nitamwita siku zangu zote” (*Zab 116:1-2*).

**H**ebu fikiria ikiwa ungekuwa unazungumza na rafiki yako mpendwa au mwenzi wako kwa nadra. Ndani ya muda mfupi uhusiano huo ungevunjika, na kungekuwa na tatizo. Vivyo hivyo, maombi ni sehemu muhimu ya kuwa na uhusiano wa karibu na Mungu. Ni tabia muhimu sana ya kiibada, ambayo kila mmoja wetu anaihitaji na anaweza kuiimarisha. Kama hatuombi mara kwa mara na bila kukoma, tutatanga mbali na Bwana muda si muda.

Katika Biblia, tunajifunza juu ya maisha ya watu tofauti walioomba kwa namna tofauti. Tunaweza kurudi nyuma kidogo na kuangazia juu ya namna mazungumzo yao na Mungu, yalivyobadilisha mahusiano yao na Mungu, namna na ni kwa ajili ya nini tunapaswa kuomba na jinsi ambavyo maombi yao yalibadilisha maisha ya wengine. Ni kweli: maisha yetu ya maombi hayabadilishi maisha yetu tu bali na ya wengine.

Kama lilivyo suala la kujifunza Biblia, mada hii ya maombi ina sifa zote mbili ni kubwa na muhimu na pana zaidi ya kile kinachoweza kufundishwa kwa majuma mawili. Juma hili tutajifunza masomo kutoka baadhi wa wale walio katika Biblia ambao walituaonesha jinsi maombi yalivyo kiini cha uhusiano imara na Mungu. Hebu tujifunze kutokana na vielelezo vyao.

## Danieli Mwaminifu

Danieli ni mmoja wa mashujaa wa Biblia. Tunajua kisa cha kwanza pia (*taz. Danieli 1*): “Lakini Danieli aliazimu moyoni mwake ya kuwa hatajitia unajisi kwa chakula cha mfalme” (*Dan 1:8*). Pia, kwa Danieli na rafiki zake watatu, “Mungu aliwapa maarifa na ujuzi katika elimu na hekima; Danieli naye alikuwa na ufahamu katika maono yote, na ndoto.” (*Dan 1:17*). Biblia inamwelezea Danieli kama mwenye hekima (*Dan. 1:20; Dan. 2:14, 21, 23, 48*) kwa sababu Roho wa Mungu alikuwa ndani yake (*Dan. 4:9, 18; Dan. 5:14; Dan. 6:3*), na alipendwa sana mbinguni (*Dan. 9:23, Dan. 10:11*). Haya ni baadhi ya maelezo juu ya mtu ambaye alikuwa na uhusiano thabiti na wa daima na Mungu.

Katika Danieli 2, wakati mfalme Nebukadneza alipotoa amri ya kifo kwa wenye hekima wote wa Babeli, Danieli alitafuta rehema za Mungu kuhusiana na siri ya ndoto ya mfalme (*Dan. 2:18*). Mungu alipomfunulia Danieli ndoto ya mfalme, mara ile ile aliomba.

**Soma** Danieli 2:20-23. Kwa nini Danieli aliomba na ni kitu gani tunachojifunza kutoka katika ombi hili?

---

Kadiri miaka ilivyopita na wafalme wakainuka na kuanguka, Danieli aliendelea kuwa mshauri kwa wafalme na alielezewa kama aliyekuwa tofauti “Basi Danieli huyo alipata sifa kuliko wakubwa na maliwali, kwa kuwa roho bora ilikuwa ndani yake; naye mfalme akaazimu kumweka juu ya ufalme wote” (*Dan 6:3*). “alikuwa mwaminifu, wala halikuonekana kosa wala hatia ndani yake” (*Dan 6:4*). Pamoja na kuwepo wivu wa kutisha na njama ovu (*Dan. 6:5, 6*) kutoka kwa watumishi wenzake, Danieli alidumu na kuwa jasiri katika maisha yake ya maombi.

**Soma** Danieli 6:10, 11. Aya hizi zinatueleza nini juu ya Danieli?

---

Alipokabiliwa na ugumu, Danieli aliomba. Ingawa tishio lilikuwa dhidi ya maisha yake, alidumu pasipo kuyumba katika maombi (mara tatu kila siku, kama desturi yake ilivyokuwa) na ilijulikana (katika dirisha lake lililofunguliwa mara tatu kwa siku alipokuwa akiomba kukabili Yerusalemu). Ombi lake lilikuwa kitendo halisi (alipiga magoti) na kujikita katika kushukuru na kuomba.

Kutokana na kisa kama hiki, visingizio vyako vya kutokuomba ni dhaifu kiasi gani?



## Mkao wa Maombi

Jambo linapoharibika maishani mwetu, wengi wetu huita rafiki wa karibu kulijadili. Tunapokuwa na habari njema, tunatafuta mtu wa kumweleza. Tunaweza kufanya hivyo na Mungu. "Maombi ni kufungua moyo kwa Mungu kama kwa rafiki." – Ellen G. White, *Steps to Christ*, uk. 93 Maombi hayadumishi tu uhusiano wetu na Mungu lakini humjulisha mwovu kuwa sisi ni mali ya nani. Tunapopiga magoti kuomba wakati wa asubuhi, ni kama tangazo halisi kwa nguvu za giza kwamba leo tumemchagua Mungu. Si hivyo tu, bali Mungu hutuma malaika kuwa upande wetu tunapooomba, nasi tumezingirwa na kulindwa dhidi ya adui wa giza (*Zaburi 91*).

Kitendo halisi cha kupiga magoti katika kujisalimisha huonesha mkao wa unyenyekevu. Kwa namna fulani ni tofauti na kukaa kwenye kiti au kulala kitandani wakati tukiomba, ingawa tunaweza pia kuomba tukiwa katika mikao ya jinsi hiyo pia. Hata hivyo, tunapopiga magoti mbele za Mungu, tunaonesha kwamba tuko tayari kumtumikia Mungu kwa mioyo yetu yote, na maneno yetu yanatangaza kwamba yeye ni Mwenye Enzi na kwamba sisi tu watoto wake tuliombwa naye tu.

**Soma** aya zifuatazo za Biblia na kutafakari maisha ya watu walioomba wakiwa wamepiga magoti: *Dan. 6:10, Lk. 22:41, Mdo. 7:60, Mdo. 9:40, Mdo. 20:36.*

---

Kuomba katika hali ya kusimama ilikuwa desturi ya kawaida katika nyakati za Biblia (*2 Nya. 20:5, 6, 13; 1 Sam. 1:26; Ayubu 30:20; Lk. 18:11, 13*). Biblia pia hutupatia mifano ya watu walioomba hali wameketi (*2 Sam. 7:18*). Wengine walisujudu mbele za Mungu, nyuso zao zikiwa sakafuni –ingawa mkao huo ulihusishwa na maombi mara chache, basi zaidi sana kujishusha mbele ya mkubwa (*1 Fal. 1:47, Mk. 14:35*).

Mkao wako wa kawaida wakati wa maombi ni upi? Biblia haitutaki kuomba katika mkao fulani mahususi, lakini mkao ni muhimu, kwa vile unaonesha kicho chetu, hisia zetu za ndani, na shauku yetu ya kujisalimisha kwa Mungu. Baadhi ya watu hawawezi kupiga magoti; kwa hiyo, kilicho muhimu zaidi ni hali ya moyo. Kama unaweza kupiga magoti lakini kwa kawaida hufanyi hivyo, kwa nini usijaribu kupiga magoti wakati mwingine ukiomba na uone inaleta matokeo gani katika muda wako na Mungu.

Biblia inatutaka "kuomba bila kukoma" (*1 The. 5:17*), ikimaanisha kuomba daima (*Kol. 4:2*) na ustahimilivu (*Rum. 12:12*). Leo utakaposimama, kuketi, kulala au kutembea geuzia fikra zako kwa Mungu na uzungumze Naye kama Rafiki. Anza sasa hivi.

## Henoko Alitembea na Kuzungumza

**Soma** Mwanzo 5:22-24. Ni nini, hasa tunachojua juu ya Henoko?

Biblia haielezi Mengi kuhusiana na maisha ya Henoko lakini inatuambia kwamba alitembea na Mungu kwa miaka 300 hadi Mungu akamtwa kwenda mbinguni. Ni jambo zuri kiasi gani kwamba maisha ya mtu yanabainisha na ibada yake ya daima kwa Mungu!

Jambo moja tunalojua ni kwamba Henoko lazima “alidumu katika kusali” (*Rum. 12:12*) akistahimili, na kuzidi kuimarisha uhusiano wake na Mungu katika imani kupitia katika uzoefu wake wa kila siku. Dunia ilikuwa inazidi kuzama katika uovu katika wakati ambao aliishi, na Henoko akajishughulisha zaidi katika kumtumikia Mungu, lakini asingeweza kulifanikisha hilo pasipo kukaa ndani Yake. “Katikati ya maisha yenye shughuli nyingi, kwa uthabiti Henoko alidumisha mawasiliano yake na Mungu. Kadiri kazi zake zilivyomshinikiza zaidi, ndivyo maombi yake yalivyozidikuwa ya kudumu na makini... Baada ya kubaki miongoni mwa watu, kwa muda fulani, akijishughulisha ili kuwafaidisha kwa mafundisho na kielelezo, alijitenga, ili atumie wakati fulani akiwa peke yake, akiwa na njaa na kiu ya kupata maarifa ya mbinguni ambayo Mungu pekee ndiye anayeweza kuyatoa. Kwa kuwasiliana hivyo na Mungu, Henoko alizidi sana kuakisi sura ya Mungu... hata wasiomcha Mungu waliangalia kwa hofu chapa ya mbingu katika uso wake.” Ellen G. White, *Wazee na Manabii*, uk. 85.

Mungu hatuagizi kuishi kama wapweke au watawa, tukijetenga kabisa na ulimwengu kiasi cha kutokuwa na manufaa yoyote duniani. Kama Henoko tunaweza kuwa wenye manufaa na wenye kutambua mahitaji katika maeneo yanayotuzunguka, lakini ni pale tu tutakapotembea na kuzungumza na Mungu, kupitia kwa uhusiano thabiti wa daima ndipo ataweza kuidhihirisha tabia Yake ya ajabu kupitia kwetu.

Tunaweza kuomba wakati wowote mahali popote. Hakuna mahali dunia ambapo Mungu hawezi kutuona au kutusikia (*Zab. 139:7-12*); daima Anasikia vilio vya mioyo yetu, haidhuru tuwe wapi (*soma Maombolezo 3:55-57*). Lakini kuna kitu kinachopaswa kusemwa juu ya kuomba kwa sauti badala ya kuomba kimoyomoyo. Tunapoomba kimoyomoyo, mawazo yenu yanaweza kuchepushwa au hata kushindwa kuhitimishwa mlolongo wa fikra zetu, au sentensi zetu. Na linaweza kuwa jambo gumu kwa fikra zetu kumakinika. Bali tunapoomba kwa sauti iwe kwa kunong'ona au kwa sauti yetu ya kawaida, inatukumbusha kwamba Mungu ni halisi, kwamba anasikiliza, na kwamba tuna jambo letu tunalozungumza Naye.

Kadiri unavyoendelea na shughuli zako leo, ni wapi au ni kwa njia gani utanong'ona ombi katika mazungumzo na Yesu?



Ingawa ni bayana Henoko alikuwa na uongozi wa karibu na Mungu, tuna ufahamu zaidi juu ya uhusiano wa Musa na Mungu na tunaweza kusoma simulizi kadhaa juu ya mazungumzo kati ya Musa na Mungu. Kadiri tunavyosafiri na Musa kupitia katika milima na mabonde ya maisha ya kiongozi huyu mnyenyekevu, tunaona tena na tena sehemu moja muhimu kabisa ya maisha yake na siri ya mafanikio yake kama kiongozi mcha Mungu ilikuwa mawasiliano yake ya daima na uhusiano wake wa kudumu na Mungu.

**Soma** Kutoka 33:15-23. Nini ni maudhui na namna ya mazungumzo kati ya Musa na Bwana?

Hebu fikiria jinsi ambavyo ingekuwa kuzungumza na Mungu na kuisikia sauti Yake kabisa. Ni ajabu kwamba Waisraeli hawakutafuta aina hii ya mazungumzo badala ya kumsihi Musa kuongea na Mungu kwa niaba yao (*Kut. 20: 18-21*). Lakini, Mungu alikuwa amemwandaa Musa kwa ajili ya jambo hili, kuanzia katika mazungumzo yao katika kichaka kilichokuwa kikiwaka moto, katika mlima huu huu. Ingawa tunasoma juu ya maombi mengine binafsi ya Musa, tunaona kwamba ni kama wakati wote yupo mbele za Mungu, akiomba mwongozo na kufanya maombezi kwa ajili ya watu anaowaongoza.

**Katika** matukio mawili, Musa anafanya maombezi kwa ajili ya watu wa familia yake. Maombezi yake yalizingirwa na hali gani, na ni kitu gani kingeweza kutokea ikiwa asingeingilia kuziba pengo hilo?

- Haruni: *Kut.* 32:1-14, 31-34; *Kum.* 9:20
- Miriamu: *Hes.* 12:13

Kitu hasa kinachostaajabisha kuhusiana na mazungumzo na Miriamu ni kwamba

Musa ndiye alikuwa mwathirika wa vitendo vibaya na wivu wa Miriamu. Ingekuwa rahisi kwake kurudi nyumba na kumwacha Mungu atekeleze adhabu ambayo Haruni na Miriamu walistahili. Badala yake, alikuwa mwepesi kusamehe na kufanya maombezi kwa ajili ya uponyaji wa dada yake. Ni udhihirisho mkuu kiasi gani wa neema ya Mungu yenye kusamehe wenye dhambi tunayoiona hapa katika vitendo vya Musa.

Soma Mathayo 5:44 na Wakolosai 3:13. Utawezaje kujifunza kutenda kile unachoelezwa hapa? Kwa nini ni muhimu ufanye hivyo?

## Musa Afanya Maombezi kwa Ajili ya Taifa

**Soma** Kutoka 32:31,32. Je, hii inatufundisha nini juu ya Musa na maombi?

Kwa ujasiri Musa alifanya maombezi kwa ajili ya watu wa Mungu tena na tena. Musa alimgeukia Mungu watu walipokuwa na kiu (*Kut. 15:25; Kut. 17:2-6*), watu walipokuwa na njaa (*Hes. 11:21, 22*), na katika hali ya kukata tamaa (*Hes. 11:11-15*).

Waisraeli walipotengeneza ndama wa dhahabu muda mfupi baada ya Mungu kufanya agano nao, Musa alikumbuka: “Kwa kuwa niliogopa hasira na makamio aliyowakasirikia BWANA kutaka kuwaangamiza. Lakini BWANA alinisikiza wakati huo nao” (*Kum. 9:19*).

Wapelelezi waliporejea kutoka katika Nchi ya Ahadi, Musa alikumbuka, “Ndipo nikaanguka nchi mbele za BWANA siku zile arobaini usiku na mchana nilizokuwa nimeanguka nchi; kwa kuwa BWANA alisema atawaangamiza” (*Kum. 9:25*).

Kabila la Lawi lilipotengwa kutoka katika makabila mengine ili lihudumu hekaluni, Musa alikumbuka, “Nikakaa mle mlimani kama hapo kwanza, siku arobaini usiku na mchana; BWANA akanisikiza wakati huo nao; asitake BWANA kukuangamiza” (*Kum. 10:10*). Mungu alisikia maombi ya Musa.

Tunaweza kujifunza mengi kutokana na maisha ya Musa kuhusiana na suala la maombi na kushikamana na Mungu:

- Musa alikuwa na upendo wa kina kwa Mungu na uelewa safi wa tabia Yake. Mungu alijielezea Mwenyewe kwa Musa katika Kutoka 34: 6 “BWANA akapita mbele yake, akatangaza, BWANA, BWANA, Mungu mwingi wa huruma, mwenye fadhili, si mwepesi wa hasira, mwingi wa rehema na kweli.”
- Musa alikuwa mwenye ujasiri na mwaminifu wakati akishikamana na Mungu katika mema na katika changamoto za safari ya kuchosha kwenda katika Nchi ya Ahadi. Ingawa alipitia mahangaika kama ilivyo kwetu sote, Musa alitegemea nguvu za Mungu, kuwepo Kwake, na uongozi Wake katika maisha yake binafsi (*Kut. 33:13*).
- Musa alimkumbusha Mungu juu ya Agano lake (*Kut. 32:13*), alidai ahadi za Mungu kwa niaba ya watu Wake (*Kum. 7:8*), na alikumbuka jinsi Mungu alivyokuwa amewaongoza katika siku nyuma (*Kut. 8:2*).
- Musa alikubali majibu ya Mungu kwa maombi yake, hata kama yalikuwa ya ndio au hapana. Kuwa na uhusiano wa karibu na Mungu haimanishi kwamba lazima tupate chochote tunachotaka (*Kum. 3:23-29*), lakini tunapaswa kuomba bila kukoma, hata hivyo (*Luka 18:1-8*).



**Jifunze Zaidi:** Hatimaye, tunapaswa kuomba kwa vile tunampenda sana Mungu, na hatuwezi kabisa kumudu kutomweleza kila kitu katika maisha yetu: furaha zetu na "ushindi" maishani, mizigo yetu na hofu zetu, haja zetu na mahitaji yetu ya kila siku "Twaweza kufunga mlango wa kila fikra isiyo safi na mawazo machafu kwa kupandisha roho katika uwepo wa Mungu kupitia maombi ya dhati. Wale ambao mioyo yao iko wazi kupata msaada na mbaraka wa Mungu, watatembea katika hali ya utakatifu kuliko ile iliyoko duniani na watakuwa na mawasiliano ya kudumu na mbingu... Tunahitaji kuwa na mitazamo bainifu kuhusiana na Yesu na ufahamu mkamilifu zaidi kuhusiana na mambo ya umilele.

Mwoneshe Mungu mahitaji yako, furaha yako, uzito wako, mashaka yako na hofu zako. Huwezi kumwudhi Mungu wala kumchosha. Yeye ambaye huhesabu nywele za kichwa chako, hawezi kutojali mahitaji ya watoto wake...

Moyo wake wa upendo huingiwa na huruma, tukiwa na huzuni na hata tukizitaja. Mwambie mambo yote yanayofadhaisha moyo. Hakuna uzito unaomshinda, maana ndiye anayeendeleza dunia zote za mbinguni. Hutawala malimwengu. Hakuna chochote kwake kinachohusu amani yetu ni kidogo Kwake kukiona. Hakuna sura katika uzoefu wetu ambayo ni ya giza kiasi cha Yeye kutoweza kusoma, hakuna mashaka yaliyo magumu Kwake kiasi cha Yeye kushindwa kutatua. Hakuna msiba uwezao kumpata hata mtoto Wake aliye mdogo, wala jambo linalomhangaisha au kumfurahisha, wala hakuna maombi yatokayo moyoni mwa mmojawapo wa watu Wake, bila Baba yetu aliye mbinguni kuyaona yote na kusikia mara moja... Mungu humfikiria na kumwagalia kila mtu kana kwamba hakuna mtu mwingine wa kumshughulikia ila yeye tu ambaye Mwana Wake Mpendwa alikufa kwa ajili yake." Ellen G. White, *Jipatie Amani Moyoni*, uk. 75-76.

## Maswali ya Kujadili:

- ① Je, ungeelezea maombi kama kitu kizuri au mzigo? Nini kimesababisha uwe na mtazamo huo?
- ② Kuna mafundisho mengi ya kina katika nukuu iliyo hapo juu. Ni fundisho gani hasa linagusa moyo wako?
- ③ Katika wahusika wa Biblia watatu tuliojifunza habari zao juma hili (Danieli, Henoko na Musa) ni yupi ambaye unaendana na maisha yake ya maombi zaidi, na kwa nini?

**Muhtasari:** Tunaposoma habari za nguli wa maombi katika Biblia, inaweza kuwa rahisi kudhani kuwa hatuwezi kuwa uhusiano wa karibu kiasi hicho na Mungu, au kujitoa kiasi hicho. Lakini tunaweza. Kama Danieli tunaweza kuwa thabiti na waaminifu katika kupiga magoti kila siku, haidhuru kuna upinzani gani. Kama Henoko, tunaweza kuchagua kutembea na kuzungumza na Mungu, tukimgeukia kabla ya kufanya kazi aliyotuita kufanya. Kama Musa, tunaweza kuwaongoza wale walio katika ushawishi wetu, tukifanya maombezi kwa ajili ya familia zetu na wale walio katika jumuiya zetu tunapochagua kukaa chini ya uvuli wa Mwenyezi, Kiongozi na Rafiki yetu.